



徐騎省集三十卷世至善本所傳者惟影宋抄本最為近
古然亦不易得郡城因明汪錫瓚曾有校影宋本今
疎漫日精廬 蔭棠早博采予傳校其中謬脫頗
藉以校補宋諱缺筆亦均是正陳彭年序一篇并
抄足而稱完善周州汪跋有云名抄之而實僅下宋
本一等耳其武烈帝廟碑銘缺葉上清觀記尾葉并難
獲全也至此本抄寫以李學正浩手書自娛至終至一
懈筆學正浩首寤汪得邀 異數因附識之以存

其人云叶

道光五年歲次乙酉十二月十一日所心校竟并識

影宋抄每葉二十行
行十九字

進徐騎省文集表

臣克順言伏以德必有言見稱於君子文之行遠用示
於方來矧逢

熙盛之期茂闡

欽明之化臣克順誠惶誠懼頓首頓首伏念臣本惟寒
族偶襲緒風幼服佩於義方長陶蒸於

孝治築室百堵介處於下鄉教子一經敢墮于素業

旌閭雖慙於徃事

賜書寧謝於古人家藏稍多耳剽亦久竊見故散騎常
侍徐鉉傑出江表夙負重名逮事

天朝荐升近列特受

先皇之顧遇頗為後進之宗師文律高深學術精博辭
惟尚要思在無邪克著一家之言蓋處諸公之右淳化
之歲被病考終生嗟伯道之孤歿慮若敖之餒而臣頃
在場屋獲造門墻情篤鄉關禮釣甥姪永惟感舊適值
送終臣家乃具扁舟載其靈柩直抵豫章之郡卜葬西
山之阿一掩佳城久荒宿草雖歲時靡輟為修黃石之
祠而翰墨罕存難訪茂陵之札每思編輯尤懼舛謬數
年前故參知政事陳彭年因臣屢言成臣夙志假以全
本并茲冠篇乃募工人肇形鏤板竹簡更寫無媿於前

修緝几迴觀願留於

睿覽伏望

宗文廣武感天尊道應真佑德上聖欽明仁孝皇帝陞

下清衷軫念

鴻霈延慈稍迴

虞舜之聰暫乙東方之牘

淪恩至厚俾朽骨以重榮

垂範長新耀遺編而增煥豈惟踈賤獨荷

照臨其新印徐鉉文集兩部計六十卷共十二冊謹隨表

上

進干冒

宸嚴臣無任戰汗激切屏營之至臣克順誠惶誠懼頓首頓首謹言

天禧元年十一月日三司戶部判官朝散大夫行尚書都官負外郎上護軍臣胡克順上表

批答

勅胡克順省所上表進新印徐鉉文集兩部計六十卷共一十二冊事具悉徐鉉生於江介早著時名歷事祖宗之朝當居文翰之任發揮誥命有溫雅之風備預咨詢見該通之學矧惟素履無謝古人汝克慕前修盡

編遺札俾之摹印庶廣流傳觀奏御之爰來諒恪勤之斯至覽觀之際嘉歎良深故茲獎諭想宜知悉

五日

故散騎常侍東海徐公序

秘書郎陳

彭年撰

昔姬昌既沒文不在於茲乎韓起有言禮盡見于魯矣
故尼丘降異以產民宗闕里垂言用為人傑自哲人一
往作者多岐則有孟子制其橫流荀卿平其亂轍戰國
之際百氏沸騰羸秦之餘六經煨燼菁華欲極但且無
歸故賈生談仁義於前楊子宗詩書于後魏晉名士咸
重立言梁隋諸公始興宮體茲風一扇踰數百年唐氏
傷又為多比百王而雖感文章所尚方三古而終殊於
是韓吏部獨正其非柳柳州輔成其事千齡旦暮斯豈

誣哉得大道之將行故由天意幸斯文之未喪亦繫人
謀其有道冠人倫才為世表令名不泯百代攸宗今復
見之徐公矣公諱鉉字鼎臣其先會稽人也鄰幾之姿
生民之秀滄溟沃日流作言泉建木干星植為行圃英
才茂德光映於前修懿範清規儀形于來者美璋之始
屬唐室之多虞佩觿之初值揚都之建號公文辭濬發
不類幼童識量淹通已成大器彈冠入仕方居然賈之
年佩玉登朝即就嚴徐之列泊江東內禪文物初興廊
廟之珍獨當其任搢紳之望無出其光漢之賢巨蔡邕
歷三臺之選魏之後士索靖馳二妙之名若乃毛珩之

公清汲黯之正直王倫之知禮張華之博物鄭當時之
下士山巨源之薦賢以公方之綽有餘裕故得觀孔光
之樹久奉樞機寓荀勗之池常參獻替雖其瞻之重猶
未正名而乃眷之殊已同彼相及樓船南伐青蓋東來
遂於艱虞之辰克盡始終之節夫章臺之壁早屬秦求
方城之材果為晉用

太祖讀豫州之檄不責其非

今上聽上林之文屢言其美由是甘泉柏殿重奉

宸游瑣闥韶冠更膺

天獎王公慕義如見古人名德在時目為耆老李膺交

友不異神仙許劭言談是名月旦雖來於江左魯公於
是贈言寓彼漢中武侯以之下拜無以喻也及運逢消
長道或盈虛辭通籍之簪纓陪外藩之樽俎語鬼神之
事歸

宣室而未期留封禪之書臥茂陵而長往嗚呼惟公稟
中和之氣挺傑出之才風雨而不迷雪霜而不變瞻其
絮白如珪如璋聽其風聲如蘭如蕙自成人之始至縱
心之年險阻艱難所經多矣功名富貴皆自致之至若
平仲事君一心無改展禽秉直三黜彌光百行立身世
談其善善片言違道人知其不為豈但王佐之才獲稱

於士季公卿之量見賞於林宗乎其而立言之旨學古
之功究乎天人窮乎性理文房逸勢楚國之三休筆陣
雄風宋人之九拒昔者洞箫之賦誦之者後宮劍閣之
銘刊之者明詔賈誼過秦之作史臣置於篇中王融曲
水之辭鄰使求於座上蔡中郎之所自許則有太丘之
碑潘黃門之所用工獨是荊州之誅公並窮其淵藪仍
在上游掇其英華更多餘力雖絲毫金石無以均其雅
黼黻立黃不足方其麗草太丘之客徒欲載金述十意
之人自將焚藁豈獨語其篇什宜升洙泗之堂畫彼形
容當在靈均之廟者哉矧復六書之藝少而留心二篆

之凝老而盡妙研精不捨常惜寸陰尺牘所傳有同珍寶

聖上方欲恢千年之洪業答

上帝之耿光朝諸侯而

東巡祀介立而

降禪若乃以秦丞相之健筆兼漢郎將之雄文銘此成
功垂之不朽求之輿議公即其人斯志未終大年行盡
殲良之痛其可已乎公江南文藁撰集未終一經亂離
所存無幾公自勒成二十卷及歸中國入直禁林制詔
表章多不留草其餘存者子婿尚書水部員外郎吳君

淑編為十卷通成三十卷所撰質論稽神錄奉詔撰江
南錄修許慎說文並別為一家不列於此彭年越在幼
年即承訓導通家之舊與文舉以攸同入室之知方子
淵而豈 感生平而永嘆報德無階痛音問之長違隕
身莫贖聊存摭實用以冠篇時淳化四年七月序

行狀五十四序六十七葉
俱在末卷內

宗故金紫光祿大夫左散騎常侍上柱國東海縣開國
伯食邑七百戶責授靜難軍節度行軍司馬徐公年七
十六行狀

公諱鉉字鼎臣其先東海郟人也周德之衰偃王以仁
義所歸者七十餘國乃遜於江淮之南會稽太末里有
廟存焉積慶所鍾令嗣蕃衍故自烈考已上皆生於會
稽公所撰改卜合葬烈考太夫人於洪州西山墓誌詳
矣公與弟鎔屬烈考即世年皆幼稚太夫人撫育教導
資以生而知之咸以雄文奧學克振令譽公未弱冠以
廩釋褐為校書郎直宣徽北院機命文翰實專司之以

御密稱先主即位以本官直門下省賜緋試知制誥辭
達典雅智效勤恪嗣主初拜祠部員外郎知制誥後親
受命草詔者無所經據不根事實繇是駁議忤旨左遷
蘇州幕職途中詩云浮名浮利信悠悠四海干戈痛主
憂三諫不從為逐客一身無累似虛舟滿朝權貴皆曾
忤遠郭林泉已遍遊唯有戀恩心不改半程猶自望城
樓謫居三年嗣主知其無罪徵復本官仍知制誥公餘
力攻篆書度越陽冰而與李斯為等夷著質論十四篇
極刑政之要盡君臣之際並傳于世斯為不朽矣文章
論議與故贈揆相韓公同志齊名時人謂之韓徐及江

淮之平建州也而福州與越人拒命不服使陳覺馮延
魯招撫之未報遂擅興兵攻取時軍帥不一聽而無上
又出不以律衆敗績而退乃歸罪二使將誅之時陳覺
之使國老宗公之所舉也于是上表待罪蓋欲解救之
遂械二使以歸聽命公與韓公議赦此二人則萬姓謗
讟之怨歸于上二使首領之惠在於齊正刑書克協衆心式沮
為巨蠹遂同上疏極言其罪追正刑書克協衆心式沮
狂計嗣主親批荅疏略曰昨陳覺之行實太傅舉之矣
及師敗之後事下有司太傅無救援之詞有自訟之表
以是之故得不再思何者先朝舊臣國家元老不唯舉

人偶失可得興言直是謀之不臧亦未有加罪之理昔
魏武帝乘降劉琮之勢將兼并吳國張昭時居朝右為
吳老臣一旦勸請其君臣妾於魏此謀不以為拙曷以
為拙乎賴周瑜輩力爭而止之及魏師之敗昭亦晏然
自處吳大帝亦不之見責彼二子孤若懷憤悻之意戮
之久矣此際長流遠郡斥為庶人五木被身一家狼籍
永從流放與死何殊卿等憂國情深除奸意切諸所微
引批答未殫公與韓公同表謝略曰伏讀批答曰卿等
憂國情深除奸意切是陛下知其奸也又曰永從流放
與死何殊知陛下必不用也既知而棄雖在何為公事

君匪躬嫉惡好直危言危行始終不變率此類焉尋徵
拜中書舍人公嘗嘗誘掖後進苟有一善必延譽之潔已
請益者亦誨導之不懈壬子歲翰林學士江公知貢舉
始以進士王克貞等三人及第盡復舉場之故事獨由
公左右贊成之江公即長興三年盧華下及第嗣主因
問北朝取人何如卿此來江公對以北朝公薦私囑相
半若此來唯以公道選材實無有此事嗣主甚善之中
書舍人張緯聞之以為皆大朝及第不本江公之意甚
銜之時宰執皆非名第同力欲罷此科遂下制輟應舉
焉明年公兼判文理院遂首言此事纔復不可遽止乃

以進士張

仲尼

鳳賦朱觀老子猶

龍賦郭賁無聲樂賦印葵石城虎踞賦寫之以進遂下
制云去歲所司上言暫罷貢舉本難久廢况以經年其
諸色舉人並宜依舊解送自此不復廢矣公之為文長
於典雅直而不迂以理勝為貴其武成王廟碑序末云
微臣學愧常師用慙兼備承明再入故無經國之材宣
室徵還幸對受釐之問將使延州聽樂長聞雅正之聲
圯上受書世出帝王之佐蔣莊武帝廟碑序末云微臣
潤色無功討論奚取思問神於先聖姑欲事君苟獲罪
於玄穹曷容媚竈唯於舊史想見英風適當罷役之初

爰奉屬辭之詔西州作頌誠慙邑子見稱南國刊銘或
望至尊所改又銘末云謝傅長逝王公不作獨我莊武
先迂睿略斯皆披文相質立言邁俗豈為情見乎詞而
已矣時江南建興建屯田楚州常州尤甚聚斂培克之
輩侵奪射利民不聊生言事者累諫弗聽洎國老宗公
上疏主者堅執不易于是命公往察訪一如親行可興
可廢悉以便宜從事後奏公既行而羣黨已切齒矣楚
州應非理遷入屯田之產業盡還本戶百姓謹譁感泣
如釋犴狴次至常州亦如楚州處置協比衆惡之徒
以擅作威福徵還私第待罪蒼蠅貝錦膠固組織詰難

太上御名

問狀不容自理鍛鍊深刻將置大辟其貶制乃張緯所
草末云尚以年齡方壯文學甚優特出彝章宜從流放
於是長流舒州時弟錯任右拾遺集賢殿直學士亦貶
秘書郎分司東都公前左遷秦州弟亦貶烏江尉及流
舒州親友臨江相送韓相有詩云昔年悽斷此江湄風
滿征帆淚滿衣今日重憐鵬翎羽不堪波上又分飛在
同城三年唯游覽勝境披翫典籍尤攻吟詠情性未嘗
以得喪蔓芥于方寸譔周將軍廟碑銘文宣王廟碑序
喬公序記九疊松讚皆足志之文刻于貞石及疊移饒
州未登途而周世宗之師過淮取舒斬公遽携家榜小

舟由皖口歸昇州公賦詩末云一夜黃星照官渡本初
何面見田豐其情發于中不顧言之太直如此明拜授
太子左諭德未幾獲復知制誥拜中書舍人通署中書省
事時周世宗弭兵修好待嗣君以優禮異數凡章表往
復討論潤色多公所為及世宗崩祭文寔公視草嗣主
嘉賞時人傳寫為之紙貴侍嗣主殂于豫章護喪歸建
業後主即位官職如故而訪聞詢謀無改嗣主之道其
知舉也不獨考其文章必先察其德行故難於得人出
羣拔萃者最稱吳淑復以子妻之其所問策五道盡時
務政理之要後主並親答焉仍俾詞臣悉對之後主以

尚書省綱條弛紊官司怠棄積習已久思公正之人以糾劾提振之徙公為尚書左丞逾月而罷以尚書右僕射游公判六司拜公為工部侍郎知制誥翰林學士尋以憲署曠職法吏侮文非委直清不能嚴肅拜公御史大夫而佞用讒勝吾道不行於是奉身而退拜兵部尚書知制誥翰林學士以先奉命修嗣主實錄乃專以屬辭比事為務後主每有著述必令公兄弟視草而後編錄故雜說公為之序文集弟集賢舍人為之序彼昔之二龍兩驥烏足以方茲令名焉王師之吊伐金陵也公急病讓夷請使於天朝以釋後主之前事辯疑分謗且

服罪降名以鄗入為請庶不隳奕世之國祀已行遂拜右僕射同參左右內史事及覲

太祖敷奏忠慤執議誠信雖不得請

太祖亦甚嘉歎美其秉節無撓既復命自以不能副後主之望雪泣固讓不受其新命焉尋從後主歸朝授太子率更令

皇上登極素知公之文學優贍久司教令特授直翰林學士院拜給事中侍從

鑿輿下并汾襲偽之地巡狩魏博逐入寇之虜申威耀德因壘懷來告至策勲詔示填委雖翰林諸公盡熙帝

之載而公亦豫有力焉數年拜右散騎常侍慶恩升左散騎常侍末年公著靜齋自箴篆書刊石寘于座右曰爰有愚叟栖此陋室風雨可蔽戶庭不出知足為富娛老以逸貂冠蟬冕虎皮羊質處之勿疑永爾終吉後之君子觀之有以見公名重益謙德成藏密與其一無所鑒而窺冀所不休者是天之戮民不可同年而語矣惟公未冠筮仕名稱籍甚日彰夙習非聚學辨問之所克也稟心忠正治身儉約公家之事知無不為自幼至老惡其聚斂貪冒未嘗微寘于懷俸祿所入不問多少隨時供億而已居處求安不務顯敞但聊以蔽其風雨量

家所受餘分貸親故舊知寓止焉與人交有始有卒必誠必信久要不替雖中或不善人無間然初與禮部尚書常夢錫給事中蕭儼之為莫逆蓋以二公常忿宗國老粗於締太上御名之業包藏凶慝每章言其罪公亦同力嫉惡先主嗣主因審度為虞故不任之以政及宗國老暮年因陳覺李徵古協謀不軌貫盈事發同時殛死嗣主追念常蕭與公疇昔敢言果今日之速禍也時常公已卒因言曰夢錫常欲殺齊王恨其誅戮不見於是贈右僕射焉適後主從容言及此事公且曰夢錫先卒不見齊王之敗嗣主已追贈矣唯臣與蕭儼之目覩朝典况

臣塵忝官列八座矣獨蕭儼之往為理官以赦前失入
貶黜吉州以老告退願以臣今所居官授儼之旌其先
見後主由是召蕭儼之至建業以公所陳列慰勞特授
工部尚書以年過懸車致仕居吉州給奉祿終身為公
於內外族視無踈密待之如一其有孤嫠無告者皆糾
合收養稱家之有無隨事拯濟婚嫁視之如家人子雖
讒口謗議紛紜盈耳公自信不疑唯恤念舊是急不知
其他及左遷邠岐亦望此獲譴矣有子曰夷直朗州桃
源令先公疾卒女三人長適左贊善大夫高御交次女
適國子博士吳淑先公卒次女幼有才淑未笄而卒公

享年七十六某年月日以疾終於邠州官舍恬然神氣
不亂唯禁家人勿哭以為坦化但囑以殯歸於洪州西
山祔葬于烈考太夫人之墓即以某年月日洪州胡某
以舟至京護載公之柩歸西山從理命也公業隆儒行
奉五常而不墮志嚮道風稟三寶而無玷故其立言蘊
德久而彌芳繕性觀妙老而益壯實古之人與克播遺
風允資鴻筆謹狀

徐公行狀

大宋故靜難軍節度行軍司馬檢校工部尚書東海徐
公墓誌銘

徐金花光祿大夫尚書右僕射兼中書侍郎平章事監修國史上柱國隴西郡開國公李昉撰

上即位之元年冬以學士李昉獨直翰林詔太子率更
令徐鉉入院分直視草是時昉與公以同道相知論交
契之始也越四年春

天子帥六師親征太原并壘既平遂北幸塞垣耀兵廬
龍秋七月凱歌歸於京師軍衛之中書詔填委公援
筆馬上應答如流以扈蹕勞遷給事中直學士院如故
又四年授右散騎常侍始罷文翰之職端拱元年帝

親耕籍田改左散騎常侍積階至金紫光祿大夫叙勳
至上柱國累封至東海郡開國侯食邑一千戶以淳化
二年秋九月檢校工部尚書出為靜難軍節度行軍司
馬明年八月二十六日晨時起方冠帶遽命筆硯語左
右曰吾疾作矣手疏一幅約束後事又別署一幅道者
天地之母書訖而終年七十六陝西道轉運副使鄭適
來邠州遂出家財竭力襄事即以其年十月奉遷靈柩
還京師權厝於板橋東南之佛舍愛壻國子博士吳
淑門生殿中丞杜鎬時皆典治中秘書遂以公凶訃聞
上覽表軫^悼語出內府錢二十萬賜其家及明年七月

洪州奉新縣義門胡仲堯自豫章具舟楫迎公之喪葬
於洪州新建縣西上之鸞岡原奉遺令從先塋也公字
鼎臣其先會稽人自言生於揚州曾祖諱源祖諱徽皆
隱德不仕父諱延休衛尉卿贈左僕射才高道直有名
於時公幼孤與弟錯俱苦節自立未弱冠以文行稱于
時仕江南李氏周旋三世歷校書郎直宣徽北院尋直
門下省三知制誥一遷司封郎中兩拜中書舍人再入
翰林為學士自貶官起為太子右諭德由尚書左丞為
兵部侍郎為御史大夫由大夫為吏部尚書由尚書為
右僕射同參左右內史事堅讓不就王師下金陵隨後

蘇馬先生集
主歸朝以太子率更令奉朝請今諫議大夫張公佖說
在江南時奉太夫人慈訓不妄游下帷著書雖親族罕
見其面年十六過李氏先主霸有南土辟命累至釋褐
連任書府繇是經史百家爛然于胸中矣其典誥命也
落筆灑翰應用無窮皆混然而成有雅正之體當時名
士如韓熙載者無敵尤長於制誥公與之齊名其豫機
密也居中守正無所附會雖在家宴居如對君父其恭
慎也如此當時用事臣有陳覺魏岑者樂禍好權多撓
時政公嫉之如讎其掌貢舉也至公取人不受私謁先
策問而後詞賦進德行而黜浮華當時舉場號為得士

公弟內史舍人鍇每主文柄亦以直道自持故江表後
進力學未至者聞二徐為春官多望風引退其精鑒無
私也如此其持憲也當官執法無所屈撓姦邪為之側
目權貴因之斂手當時言風憲者惟公與故御史中丞
江文蔚王師之渡江也公將本君之命使於朝廷且乞
緩師以奉祭祀 太祖引見謂公曰汝主託疾不朝乘
事大之禮况吾兵業已行無中輟之理歸報汝主善為
之謀公曰慷慨鋪陳自古成敗之道表明後主忠孝之
節 太祖亦為之動容原禮之遣歸初大軍已圍建業康
後主思命於交兵之間左右咸有難色公欣然請行後

主謂之曰爾既往即當止江上救兵勿令東下公曰是行非全策今城中所恃者救兵奈何以臣此行止之後主曰比以和解為請復用決戰即是自相矛盾于爾得不危乎公曰今豈以一介之微而忘社稷之重但置臣於度外耳後主撫之泣下曰時危見節汝有之耳及歸朝

太祖盛怒責之曰吾向與汝言何為弗達於汝主且拒抗之罪皆汝所為公頓首謝曰臣為江南大臣而其國滅亡抵此死有餘罪餘復何言

太祖於是歎息曰忠於所事者乎汝當事我如事李氏

命生存撫甚厚故相太子太師王公溥一見如舊相識每有經史異義多質疑於公繇是琴樽嘯歌筆硯酬唱無有虛日相得甚歡故工部尚書李公穆有清識嘗語人曰吾觀江表冠蓋若中立有道之士惟徐公近之耳

兵部侍郎王公祐負才尚氣未嘗輕許人及見公常言於朝曰文質彬彬學問無窮惟徐公耳公亦曰王公詞如江海心無城府真奇士也今吏部侍郎李公至翰林學士承旨蘇公易簡皆當世英俊奉公以師友之禮公任朝廷將二十年前後錫賜所得俸祿所入備伏臘外未嘗蓄聚一金所居之地僅庇風雨惟古木數株每夏

秋之際霖潦為患頽垣壞宇人不堪其憂而公處之晏如也江南故人子弟暨親族之孤遺者來投于公歲無虛月公分廩祿以卹之虛館舍以安之殆于終年未有倦色有布衣蒯亮者老而多誕游公之門僅五十稔年九十猶矍鑠不衰每從江南來詣公公置之道院日與之碁未嘗語及他事而待之如初公嘗言江南有處士朱真白嘗語人曰今人或言不欺神明也吾嘗佩服斯言不敢為欺心之事有故人謝岳嘗為虢州盧氏令刺史與之有隙凡選舉之制過七十即罷去遂奏謝年過不堪其任時江東初下任人有可疑者咸質於公謝因

私請曰某之齒公實知之苟朝廷問公不敢望公言未七十但言不知其年即幸矣公曰君之甲子某具知之而云不知是欺天也苟或見問必以實對其至行無誑又如此公為文智思敏速或求其文不樂豫作令其臨事見白立為草之云速則意壯敏緩則體勢踈慢公愛壻吳淑言江南宰相馮延巳常語人曰凡人為文皆事竒語不爾則不足觀惟徐公不然率意而成自造精極時人以為知言所著文多遺落今其存者編成三十卷又擬徐幹中論作質論數十篇集耳目聞見之異作稽神錄二十卷並行於世公文學之外長於篆隸其書

札之妙自成一家當世士大夫有得其書者無不寶之
以為楷法任常侍日奉詔與直史館句中正等重修許
慎說文自撰韻譜一十卷學者伏其精博公嘗慕老子
清淨之教莊周齊物之理故內不能以得喪動外不能
以榮辱干然而為學之心老而彌篤在邠州日以時俗
文字偽謬乃親以隸字寫說文字體纖細正如蠅頭過
數萬言年高目明洞見毫末其精力不怠如此夫人太
原王氏子朗州桃源令夷直並先公而卒長女適吳氏
早亡次女適左贊善大夫高慎交幼女十七娘才淑過
人未及笄年而夭自為誌文詞甚悽楚意孔門四科德

行文學洪範五福壽考康寧在於古人鮮有兼美惟公
高才懿行善始令終所謂登孔門之二科居洪範之三
福也語曰善人吾不得而見之矣惜哉銘曰
祖正軻兮宗老莊奉三寶兮師五常生維揚兮任建康
歸皇宗兮老大梁歿幽土兮葬豫章儒林文人兮今也
則亡嗚呼

祭文

維淳化三年歲次壬辰十月辛酉朔十八日戊寅銀青
光祿大夫行尚書吏部侍郎兼祕書監上柱國李至朝
奉大夫左諫議大夫充史館修撰判館事上柱國賜紫

金魚袋揚徽之張洎等謹以清酌之奠致祭於 故左
騎省常侍徐公之靈惟公博識宏才懿文茂學如金之
渾如玉之璞天然渾成不加彫琢頃在江左已聞素履
及來 天庭孰不仰止周旋清顯殆將二紀相如視草
隲朋近侍篆籀稱絕典謨得體其馨如蘭其直如矢令
聞令望之才之美今也儒宗古之君子五百年來一人
而已道屈於位遇 休明之世未盡伸才困于命當衰
晚之年不得志嗟乎天地之間人生如寄自古迄今其
誰不死矧素髮之垂領復何悲乎已矣可惜者淪於遠
郡契濶千里鵬鳥之賦未成二豎之災奄至溘于意兮

止一女鄧伯道兮終無子此素友清交門生故吏可以
失聲而長號汎瀾而屑涕以為天道難忱善人如是至
受教文字執弟子之禮徽之洎有舊瀟湘敦故人之契
迎旅櫬于西郊風切切兮雨蕭蕭靈筵慘兮素幃動疑
盼嚮於寂寥嗚呼臨喪一奠庶英魂之可招尚享

東海徐公挽歌詞

李 至

吾道亡宗匠明時喪大儒傳家無嗣子封岳有遺書命
劣長沙賈名齊鄴下徐不知千古後文行復誰如
執友韓夫子傳家弟楚金人稱聯璧重世慕二龍深鮑
謝須慙德機雲亦醉心可憐黃壤下埋沒此瑤琳

海內才名重儒中學問高病猶不釋卷老亦自揮毫蠹
簡披皆識亡書誦豈勞如能百身贖爭惜一鴻毛
說文修古篆質論著新詞尚父鷹揚頌周瑜水戰碑家
藏為世寶手寫作人師不惜歸宣室吾皇問受釐
薄暮邠郊遠何人不慘顏無兒見星往有妾護喪還舊
宅猶臨水空車却度關平生衣上淚今日為君斑

左散騎常侍東海徐公

此五公詠中之一

徐公真丈夫不獨文章伯江南兵未解主憂臣慘戚公
願紓其難吾求使上國庶獲一言伸少息芑茅責其君
驚且歎執手涕沾臆謂言知爾晚何此忠義激天子叱

在庭請讓雷霆赫公亦從容對曾不渝神色仁者必有
勇斯亦古遺直書大略其小我有春秋癖所以此詩中
不言公翰墨庶警事君心勉旃希令德

後序

徐公既沒門人等論次其文為三十卷叢秘閣吳正儀
今翰林穎川公並為之序論之詳矣都官員外郎吳君
克順通才博雅樂善好賢早游騎省之門深蒙鄉里之
眷寶茲遺集積有歲時鏤板流行庶博悠永因以丞相
趙郡文貞公鄧帥隴西公所作墓誌挽詠等列于左次
用垂茂實俾題於後以記厥由大中祥符九年八月太

後序二篇俱另葉起

常丞集賢校理晏 珠序

明州重刊徐騎省文集後序

騎省徐公文集三十卷天禧間尚書都官員外郎胡君
克順編錄刊行且奉表 上進

章聖皇帝隆詔獎諭參知政事陳公彭年為之序引丞
相晏元獻公復為後序騎省在江南有重名仕天朝為
近侍以文翰忠直在當時諸公先既歿丞相趙郡李文
正公實誌其墓所以稱述推尊之者甚至距今且二百
年其英名偉節得以不泯而為後學法者繫文集是賴
年世復遠兵火中厄鮮有存者偶得善本使公庫鏤板

以傳紹興十九年十一月十日右朝議大夫充敷文閣
待制知明州軍州事提舉學事賜紫金魚袋徐 琛跋

徐公文集目錄

第一卷

文賦三首

詩三十首

第二卷

詩六十九首

歌一首

第三卷

詩七十五首

第四卷

詩七十二首

第五卷

詩七十一首

第六卷

制誥二十九首

第七卷

制誥二十六首

第八卷

制誥三十六首

第九卷

祭告文二首

冊九首

謚議一首

第十卷

碑銘五首

第十一卷

碑銘三首

第十二卷

碑銘五首

第十三卷

記七首

第十四卷

記三首

贊四首

頌一首 并序

銘二首

後賦卷全目
哀冊文二首

第十五卷

墓誌七首

第十六卷

墓誌八首

第十七卷

墓誌七首

第十八卷

序八首

第十九卷

序六首

表四首

書五首

第二十卷

表四首

書五首

狀二首

文九首

第二十一卷

應制詩一十九首

寄送詩四十九首

第二十二卷

雜詩五十九首

文賦二首

第二十三卷

序九首

第二十四卷

序五首

贊四首

論三首

第二十五卷

碑銘五首

第二十六卷

碑銘五首

連珠五首

銘三首

第二十七卷

碑銘五首

第二十八卷

記十首

第二十九卷

墓誌六首

第三十卷

墓誌六首

徐公文集卷第一賦詩上

東海徐鉉

頌德賦

木蘭賦

新月賦

頌德賦 東宮生日獻

惟先王之建國體皇極而垂制仰則觀於辰象俯則察於地義前星為帝座之輔蒼震乃少陽之位非明德與茂親不足膺茲主器故萬邦以^貞而本枝百世是必天賜嘉祉神輸百祥山河資其正氣日月分其融光應期運以載誕配乾坤而永昌者也惟我儲后昭明俊德黃

蒙元吉沉潜剛克鈞深致遠曾莫揖其津涯問安視膳
每或形於顏色在昔冲讓高追太伯乃剖麟符保釐東
宅受道師傅稽疑典冊化自誠心風行邦國乃擁干旌
南徐之城左撫句吳前封敬享京師河潤盛德日新其
畏如夏其惠如春謝傅園綦靜一方之沴氣條侯高卧
息萬里之驚塵令問孔昭元功莫二人情不可以久鬱
皇統不可以終避乃畏天命允茲儲貳鳴玉軼以徐來
與春郊而摠至龍樓霧廓雞戟風生珍符疊委和氣交
迎百度以之而式序多壘以之而載清史書有年衢傳
頌聲豈人事之協贊信宗祊之降靈于是玄圃凝陰瑤

山密雪宣猷之緹幕半下濛汜之曾冰乍結爰書慶誕
之日始過嘉平之節麗正晨啟重明夙設調護之客娛
侍之臣峩冠煒燧佩玉璘玢咸稽首而再拜獻多福于
萬春有官坊之下吏乃捧觴而進稱曰自古聖賢率由
輔導伊狗名與課實故成敗之異効粵若成王史直周
昭左右前後惟仁與孝靡過不舉無善不告茲君臣之
一體故風聲之克劭降及後代亦慎厥初實聘四老復
延二疏咸由古道以佑皇儲若乃征和戾園有思臺博
望之盛貞觀承乾有玄齡魏徵之重或有其禮而無人
或有其人而不用何擇禍之忘輕信非賢而罔共英英

副君鑒知古今百揆在乎手萬務經其心朝廷之所寄者重蒼生之所望者深既賞興王之諫亦訪百官之箴故曰生民有勤好問則裕不躬不親人將執信一游一豫樂有常度節八音以導其和平調五味以適其喜怒情義兼于家國故知無不為愛敬極於君親故惟道是諭儉以足用而施舍不可不行仁以接物而刑罰不可不具冗官宜省而才不可遺疆事漸寧而備不可去居安思危觀災而懼上分一人之憂以成天下之務俾中外之禔福與宗祧而未固伊下臣之不佞蒙國士之殊遇竇舍和而吐頌豈登高之能賦願降鑒于芻蕘庶効

誠於塵露

木蘭賦并序

頃歲鉉左宦江陵官舍數畝委之而去庭木蘭樹因移植於宗兄之家及鉉徵還席不遑暖又竄于舒庸吾兄感春物之載華擬古詩而見寄吟翫感歎謹賦以和焉雖不足繼體物之作庶幾申騷客之情爾

伊庭中之奇樹有木蘭之可悅外爛爛以凝紫內英英而

積雪芬芳兮謝客之囊旖旎兮仙童之節仙人有許蒲紫旆節

茸之竊比聽蘭牙之並列於是辭下土之卑濕歷上京

之繁華耻銜價於豪門乃託根於貧家此樹移植本自歷陽於庭中

資幽人之賞豫有好事之稱嗟一旦逐客程遠君門路
賒削閨籍與印綬組豈獨留乎此花噫人屢遐棄花猶得
地兮兔苑之餘蔭向藩房而吐媚授簡多暇攀條屬思
持香花以予比効騷辭而我寄感此生之百憂何斯物
之足貴悲夫客館長吟山城市陰想馨香之不改歎歡
宴之難尋憑歸夢於飛翼寫商歌於素琴歌曰光景兮
愁暮別離兮易久真宰兮無黨貞心兮不朽誠知異日
重滋田氏之荆但恐相逢共歎桓公之柳

新月賦庚午歲宿直作

五月五日繁陰乍晴倬彼新月麗于太清映玉繩而絢

彩揜銀漢以騰精對鷓鴣西南之影步光明東北之楹
歷歷遲漏悠悠我情雖萬古之不易感一年而始生乃
有駮女癡男朱顏稚齒欣春物之駘蕩登春臺之靡迤
雜佩璫錯輕裾颯纒紛乎拜祝怡然晏喜人歲歲以潛
換景年年而若此昔我當年胡云不然世路多故流光
暗遷易壯心於大觀變玄髮于華顛顧一毛之無濟媿
兩綬之徒懸况乎萬象虛明九門奧秘對宣室以方罷
閱通宵而不寐憂心似醉既慷慨於君恩急景如馳更
淒涼於往事想想月以長歌遂抽毫而見意

詩

早春左省寓直

旭景鸞臺上微雲象闕間時清政事少日永直官閑遠
籟飛簫管零冰響珮環終軍年二十默坐叩玄闕

寒食宿陳公塘上

垂楊界官道茅屋倚高坡月下春塘水風中牧豎歌折
花閑立久對酒遠情多今夜孤亭夢悠揚奈爾何

將去廣陵別史員外南齋

家聲曾與金張輩官署今居何宋間起得高齋臨靜曲
種成奇樹學他山鴛鸞終日同醒醉蘿薜常時共往還
賤子今朝獨南去不堪回首望清閑

將過江題白沙館

少長在維揚依然認故鄉金陵佳麗地不道少風光稍
望吳臺遠行登楚塞長殷勤語江嶺歸夢莫相妨

登甘露寺北望

京口潮來曲岸平海門風起浪花生人行沙上見日影
舟過江中聞櫓聲芳草遠迷揚子渡宿煙深映廣陵城
游人鄉思應如橘相望須合兩地情

山路花

不共垂楊映綺寮倚山臨路自嬌娆鏡游人過去知香遠
谷鳥飛來見影搖半隔烟嵐遙隱隱可堪風雨暮蕭蕭

城中春色還如此幾處笙歌案舞腰

京口江際弄水

退公求靜獨臨川揚子江南二月天百尺翠屏甘露閣
數帆晴日海門船波澄瀨石寒如玉草接汀蘋綠似煙
安得乘槎更東去十洲風外弄潺湲

早春旬假獨直寄江舍人

省署皆歸沐西垣公事稀詠詩前砌立聽漏向申歸遠
思風醒酒餘寒雨濕衣春光已堪探芝蓋共誰飛

從駕東幸呈諸公

吳公臺下舊京城曾揜衡門過十春別後不知新景象

信來空問故交親宦游京口無高興習隱鍾山限俗塵
今日喜為華表鶴况陪鷓鴣免迷津

重遊木蘭亭

繚繞長隄帶碧潯昔年游此尚青衿蘭橈破浪城陰直
玉勒穿花苑樹深官路塵埃成久別仙家風景有誰尋
那知年長多情後重凭欄干一獨吟

賦得綵鷺

縷線成飛鷺迎和啟蟄時翠翹生玉指繡羽拂文楣詎
費銜泥力無勞剪爪期化工今在此翻怪社來遲

送魏舍人仲甫為蘄州判官

從事斬春興自長
斬人應識紫薇郎
山資足後拋名路
蕓菜秋來憶故鄉
以道卷舒猶自適
臨戎談笑固無妨
如聞郡閣吹橫笛
時望青谿憶野王

題殷舍人宅木芙蓉

憐君庭下木芙蓉
嫋嫋纖枝淡淡紅
曉吐芳心零宿露
晚搖嬌影媚清風
似含情態愁秋雨
暗減馨香惜菊叢
默飲數杯應未稱
不知歌管與誰同

送史館高員外使嶺南

東觀時閑暇還修諭
蜀書雙旌馳縣道
百越從軺車桂
蠹晨殫罷貪泉
訪古初春江多好景
莫使醉吟踈

春日紫巖山期客不至

郊外春華好人家帶碧谿
淺莎藏鴨戲輕靄隔雞啼
掩映紅桃谷
蚤緣翠柳堤
王孫竟不至
芳草自萋萋

宿蔣帝廟明日遊山南諸寺

便返城闈尚未甘
更從山北到山南
花枝似雪春雖半
桂魄如眉日始三
松蓋遮門寒黯黯
柳絲妨路翠氤氳
登臨莫怪偏留戀
游宦多年事事諳

賦得有所思

所思何在杳難尋
路遠山長水復深
衰草滿庭空佇立
清風吹袂更長吟
忘情好醉青田酒
寄恨宜調綠綺琴

落日鮮雲偏聚散可能知我獨傷心

贈王貞素先生

先生嘗已佩真形紺髮朱顏骨氣清道秘未傳鴻寶術
院深時聽步塵聲遼東幾度悲城廓吳市終應變姓名
三十六天皆有籍他年何處問歸程

春夜月

幽人春望本多情况是花繁月正明竟夕無言亦無寐
繞堦芳草影隨行

愛敬寺有老僧嘗游長安言秦雍間事歷歷可
聽因贈此詩兼示同行客

白首棲禪者嘗談灞澹游能令過江客偏起失鄉愁
倚桃花崦門臨杜若洲城中無此景將子刺淹留

游蔣山題辛夷花寄陳奉禮

本約陳同游不至

今歲游山已恨遲山中幸喜見辛夷簪纓且免全為累
桃李猶堪別作期晴後日高偏照灼晚來風急漸離披
山郎不作同行伴折得何由寄所思

徐公文集卷第一

徐公文集卷第二 詩二

和殷舍人蕭員外春雪

東海徐鉉

萬里春陰乍履端
廣庭風起玉塵乾
梅花嶺上連天白
蕙草階前特地寒
晴去便為經歲別
興來何惜徹宵看
此時鴛侶皆閑暇
贈答詩成禁漏殘

寄蘄州高郎中

賈傅栖遲楚澤東
蘭皋三度換秋風
紛紛世事未無盡
黯黯離魂去不通
直道未能勝社鼠
孤飛徒自歎冥鴻
知君多少思鄉恨
併在山城一笛中

寄和州韓舍人

急景駸駸度遙懷處處生
風頭乍寒暖天色半晴陰
久別魂空斷終年道不行
殷勤雲上鴈為過歷陽城

從兄龍武將軍沒於邊戍過舊營宅作

前年都尉沒邊城
帳下何人領舊兵
徼外瘴烟沉鼓角
山前秋日照銘旌
笙歌却返烏衣巷
部曲皆還細柳營
今日園林過寒食
馬蹄猶擬入門行

景陽臺懷古六言

後主亡家不悔江南異代
長春今日景陽臺上閑人
何用傷神

春分日

仲春初四日春色正中分
綠野裴回月晴天
斷續雲鸞飛猶箇箇
花落已紛紛
思婦高樓晚
歌聲不可聞

寄駕部郎中瞻

賤子乖慵性類為省直
牽交親每相見多在相門前
君獨踈名路為郎過十年
炎風久成別南望思悠然

和王庶子寄題兄長建州廉使新亭

謝守高齋結名御新一方
風景萬家情羣賢詎減山陰會
遠俗初聞正始聲
水檻片雲長不至
訟庭纖草轉應生
阿連詩句偏多思
遙想池塘畫夢成

謝文靜墓下作時閩嶺用師契丹陷梁宋
越徼稽天討周京亂虜塵蒼生何可奈江表更無人豈
憚尋荒壟猶思認後身春風白楊裏獨步淚雷中

觀人讀春秋

日覺儒風薄誰將霸道羞亂臣無所懼何用讀春秋

秋日雨中與蕭贊善訪殷舍人於翰林座中作

野出西垣步步遲秋光如水雨如絲銅龍樓下逢閑客
紅藥堦前訪舊知亂點乍滋承露處碎聲因想滴蓬時
銀臺鎖入須歸去不惜餘歡盡酒卮

送和州張員外為江都令

經年相望隔重湖一旦相逢在上都塞詔官班聊慰否
埋輪意氣尚存無由來聖代憐才子始覺清風激懦夫
若向西岡尋勝賞舊題名處為躊躇

和明道人宿山寺

聞道經行處山前與水陽磬聲深小院燈影迴高房落
宿依樓角歸雲擁殿廊美師閑未得早起逐班行

晚歸

暑服道情出煙街薄暮還風清飄短袂馬健弄連環水
靜聞歸櫓霞明見遠山過從本無事從此涉旬間

月真歌

廣陵妓人翰林殷舍人所錄携之垂訪筵上贈此

揚州勝地多麗人其間麗者名月真月真初年十四五
能彈琵琶善歌舞風前弱柳一枝春花裏嬌鶯百般語
揚州帝京多名賢其間賢者殷德川德川初秉綸閨筆
職近名高常罕出花前月下或遊從一見月真如舊識
閑庭深院資賢宅宅門巖峻無凡客垂簾偶坐惟月真
調弄琵琶郎為拍殷郎一旦過江去鏡中嬾作孤鸞舞
朝雲暮雨鎮相隨石頭城下還相遇二月三明明江南春
滿城濛濛起香塵隔牆試聽歌一曲乃是資賢宅裏人
綠窻繡幌天將曉殘燭依依香裊裊離腸却恨苦多情
軟障熏籠空悄悄殷郎去冬入翰林九霄官署轉深沉

人間想望不可見唯向月真存舊心我慙闌茸何為者
長感餘光每相假陋巷蕭條正捨扉相攜訪我衡茅下
我本山人愚且真歌筵飲席常無情自從一見月真後
至今贏得顛狂名殷郎月真聽我語少壯光陰能幾許
良辰美景數追隨莫教長說相思苦

走筆送義興令趙宣輔

聞君孤棹汎荆谿隴首雲隨別恨飛杜牧舊居憑買取
他年藜杖願同歸

天關山絕句

散誕愛山客淒涼懷古心寒風天關晚盡日倚軒吟

除夜

寒燈耿耿漏遲遲送故迎新了不欺往事併隨殘曆日
春風寧識舊容儀預慙歲酒難先飲更對鄉儺羨小兒
吟罷明朝贈知己便須題作去年詩

寄鍾謨

看看潘鬢二毛生昨日林梢又轉鶯欲對春風忘世慮
敢言罇酒召時英假中西閣應無事筵上南威幸有情
不得車公終不樂已教紅袖出門迎

正初答鍾郎中見招

高齋遲景雪初晴風拂喬枝待早鶯南省郎官名籍籍

東隣妓女字英英流年倏忽成陳事春物依稀存舊情
新歲相思自過訪不煩虛左遠相迎

聞鴈寄故人

久作他鄉客深慙薄宦非不知雲上鴈何得每年歸夜
靜聲彌怨天空影更微往年離別淚今夕重霑衣

江舍人宅筵上有妓唱和州韓舍人歌辭因以寄

良宵絲竹偶成歡中有佳人俯翠鬟白雪飄飄傳樂府
阮郎憔悴在人間清風朗月長相憶佩蕙紉蘭早晚還
深夜酒空筵欲散向隅惆悵鬢堪班

寒食日作

厨冷煙初禁，門閑日更斜。東風不好事，吹落滿庭花。過社紛紛鶯，新晴淡淡霞。京都盛遊觀，誰訪子雲家。

賀殷游二舍人入翰林江給事拜中丞

清晨待漏獨徘徊，霄漢懸心不易裁。閣老深嚴歸翰苑，夕郎威望拜霜臺。青綾對覆蓬壺晚，赤棒前驅道路開。猶有西垣廳記在，莫忘同草紫泥來。

歐陽太監雨中視決堤因墮水明日見於省中

因戲之

聞道張晨蓋徘徊，石首東澹川。非伯禹落水，異三公衣。

濕仍愁雨冠，歌更怯風。今朝復相見，疑是葛仙翁。

送吳郎中為宣州推官知涇縣

征虜亭邊月，雞鳴伴客行。可憐何水部，今事謝宣城。風物聊供賞，班資莫繫情。同心不同載，留滯為浮名。

寄舒州杜員外

信到得君書，知君已下車。粉闈情在否，蓮幕興何如。人望徵賢入，余思從子居。灤山真隱地，憑為卜茅廬。

九月十一日寄陳郎中

我多吏事君多病，寂絕過從又幾旬。前日龍山煙景好，風前落帽是何人。

和司門郎中陳彥

衡門寂寂逢迎少不見仙郎向五旬莫問龍山前日事
菊花開却為閑人

賦得擣衣

江上多離別居人夜擣衣拂砧知露滴促杵恐霜飛漏
轉聲頻斷愁多力自微裁縫依夢見腰帶定應非

九月三十夜雨寄故人

獨聽空階雨方知秋事悲寂寥旬假日蕭颯夜長時別
念紛紛起寒更故故遲情人如不醉定是兩相思

寄撫州鍾郎中

時王師敗績於
閩中謨在建州

去載分襟後尋文在建安封疆正多事樽俎若為歡都
護空遺鏃明君欲舞干繞朝時不用非是殺身難

送歐陽太監游廬山

家家門外廬山路唯有夫君乞假遊按牘乍拋公署晚
林泉已近署暑天秋海潮盡處逢陶石江月圓時上庾樓
此去蕭然好長往人間何事不悠悠

立秋後一日與朱舍人同直

一宿秋風未覺涼數聲宮漏日猶長林泉無計消殘暑
虛向華池費稻粱

賦得霍將軍辭第

漢將承恩久圖勲肯顧私匈奴猶未滅安用以家為郢
匠雖聞詔衡門竟不移寧煩張老頌無待晏嬰辭甲乙
人徒費親鄰我自持悠悠千載下長作帥臣師

和元帥書記蕭郎中觀習水師

元帥樓船出治兵落星山外火旗明千帆日助江陵勢
萬里風馳下瀨聲殺氣曉嚴波上鷁凱歌遙駭海邊鯨
仲宣一作從軍詠迴顧儒衣自不平

秋日廬龍村舍

置却人間事閑從野老游樹聲村店晚草色古城秋獨
鳥飛天外閑雲度隴頭姓名君莫問山水與虛舟

和蕭郎中小雪日作

征西府裏日西斜獨試新爐自煮茶籬菊盡來低覆水
寒鴻飛去遠連霞寂寥小雪閑中過班駁輕霜髮上加
莫得流年無奈處莫將詩句祝蒼華

中書相公谿亭閑宴依韻李建勳

雨霽秋光晚亭虛野興迴沙鷗掠岸去谿水上塔來客
傲風歌憤筵香菊在盃東山長許醉何事憶天台

寄饒州王郎中效李白體

珍重王光嗣交情尚在不蕪城連宅住楚塞並車游別
後官三改年來歲六周銀鈞無一字何以緩離愁

寄歙州呂判官

任公郡占好山川，谿水縈迴路屈盤。
南國自來推勝境，故人此地作郎官。
風光適意須留戀，祿秩資貧且喜歡。
莫憶班行重迴首，是非多處是長安。

宣威苗將軍貶官後重經故宅

蔣山南望近西坊，亭館依然鏤院牆。
天子未嘗過細柳，將軍尋已戍蝦蝗。
史萬歲嘗謫戍蝦蝗歌傾怪石山無色，零落圓荷水不香。
為將為儒皆寂寞，門前愁殺馬中郎。

附池州薛郎中書因寄歙州張員外

新安從事舊臺郎，直氣多才不可忘。
一旦江山馳別夢，

幾年簪紱共周行，歧分出處何方是。
情共窮通此義長，因附鄰州寄消息。
接輿今日信為狂。

寄江都路員外

吾兄失意在東都，聞說襟懷任所如。
已縱乖慵為傲吏，有何關鍵制豪胥。
縣齋曉閉多移病，南畝秋荒憶遂初。
知道故人相憶否，嵇康不得嬾修書。

張員外好茅山風景求為句容令作此送之

句曲山前縣依依，數舍程還同適勾。
漏非是厭承明柳，谷供詩景華陽契。
道情金門容傲吏，官滿且還城。

送應之道人歸江西

曾騎竹馬傍洪涯二十餘年變物華
客夢等閑過驛閣歸帆遙羨指龍沙
名題小篆矜垂露詩作吳吟對綺霞
歲暮定知迴未得信來憑為寄梅花

送元帥書記高郎中出為婺源建威軍使

寒風蕭瑟楚江南記室戎裝挂錦帆
倚馬未曾妨笑傲斬牲先要厲威嚴
危言昔日嘗無隱壯節今來信不凡
唯有盃盤思上國酒醪甜淡菜蔬甘

游方山宿李道士房

從來未面李先生借我西牕卧月明
二十三家同願識素驪何日暫還城

題畫石山

彼美巉巖石誰施黼藻功回巖明照地
絕壁爛臨空錦段鮮須濯羅屏展易窮
不因秋蘚綠非假晚霞紅羽客藏書洞
樵人取箭風靈蹤理難問仙路去何通
返駕歸塵裏留情向此中迴瞻畫圖畔
遙羨面山翁

臨石步港

碕岸隨縈帶微風起細漣綠陰三月後
倒影亂峰前吹浪游鱗小黏苔碎石圓
會將腰下組換取釣魚船

病題二首

性靈慵懶百無能唯被朝參遣風興聖主
優容恩未答

丹經踈闊病相陵脾傷對客偏愁酒眼暗看書每媿燈
進與時乖不知退可憐身計謾騰騰
人間多事本難論况是人間嬾慢人不解養生何怪病
已能知命敢辭貧向空咄咄煩書字與世滔滔莫問津
金馬門前君識否東方曼倩是前身

寄江州蕭給事

夕郎憂國不憂身今向天涯作逐臣魂夢暗馳龍闕曙
嘯吟閑繞虎谿春朝車載酒過山寺諫紙題詩寄野人
惆悵懦夫何足道自離羣後已同塵

和州酬江中丞見寄

賈傅南遷久江關道路遙北來空見鴈西去不如潮鼠
穴依城社鴻飛在次寥高低各有處不擬更相招

和鍾郎中送朱先輩還京垂寄

分司洗馬無人問辭客殷勤輟棹過蒼蘚滿庭行徑小
高梧臨檻雨聲多春愁盡付千盃酒鄉思遙聞一曲歌
且共勝遊消永日西岡風物近如何

送郝郎中為浙西判官

大藩從事本優賢幕府仍當北固前花繞樓臺山倚郭
寺臨江海水連天恐君到即忘歸日憶我遊曾歷二年
若許他時作閑伴殷勤為買釣魚船

翰林游舍人清明日入院中塗見過余明日亦
入西省上直因寄游君

榆柳開新焰梨花發故枝輜輶隘城市圭組坐曹司獨
對芝泥檢遙憐白馬兒禁林還視草氣味兩相知

陪王庶子游後湖涵虛閣

東宮園

懸圃清虛乍過秋看山尋水上茲樓輕鷗的的飛難沒
紅葉紛紛晚更稠風卷微雲分遠岫浪搖晴日照中州
躋攀况有承華客如在南皮奉勝遊

柳枝辭十二首

把酒憑君唱柳枝也從絲管_處相隨逢春只合朝朝醉

記取秋風葉落時

南園日暮起春風吹散楊花雪滿空不惜楊花飛也得
愁君老盡臉邊紅

陌上朱門柳映花簾鈎半捲綠陰斜憑郎暫駐青驄馬
此是錢塘小小家

夾岸朱顏柳映樓綠波平慢帶花流歌聲不出長條密
忽地風迴見綵舟

老大逢春總恨春綠楊陰裏最愁人舊游一別無因見
嫩葉如眉處處新

濛濛堤畔柳含煙疑是陽和二月天醉裏不知時節改

漫隨兒女打鞦韆

水閣春來乍減寒
曉粧初罷倚欄干
長條亂拂春波動
不許佳人照影看

柳岸煙昏醉裏歸
不知深處有芳菲
重來已見花飄盡
惟有黃鸝轉樹飛

此去仙源不是遙
垂楊深處有朱橋
共君同過朱橋去
密映垂楊聽洞簫

暫別揚州十度春
不知光景屬何人
一帆歸客千條柳
腸斷東風楊子津

仙樂春來案舞腰
清聲偏似傍嬌嬈
饒應緣鸞舌多情賴

長向雙成說翠條

鳳笙臨檻不能吹
舞袖當筵亦自疑
唯有美人多意緒
解衣芳態畫雙眉

徐公文集卷第二

徐公文集卷第三 詩三

貶官秦州出城作

東海徐鉉

浮名浮利信悠悠四海干戈痛主憂
三諫不從為逐客一身無累似虛舟
滿朝權貴皆曾忤繞郭林泉已徧游
唯有戀恩終不改半程猶自望城樓

過江

別路如何極離腸有所思登艫望城遠
搖櫓過江遲新岸煙中失長天水際垂
此心非橘柚不為兩鄉移

徐公文集卷第三

綸闈放逐知何道
桂苑風流且暫歸
莫問升遷橋上客
身謀踈拙舊心違

贈維揚故人

東京少長認維桑
書劔誰教入帝鄉
一事無成空放逐
故人相見重淒涼
樓臺寂寞官河晚
人物稀踈驛路長
莫怪臨風惆悵久
十年春色憶維揚

秦州道中却寄東京故人

風緊雨淒淒
川迴岸漸低
吳州林外近
隋苑霧中迷
聚散紛如此
悲歡豈易齊
料君殘酒醒
還聽子規啼

得浙西郝判官書未及報聞燕王移鎮京口因

寄此詩問方判官田書記消息

秋風海上久離居
曾得劉公一紙書
淡水心情長若此
銀鈎蹤迹更無如
嘗憂坐側飛鴉鳥
未暇江中覓鯉魚
今日京吳建朱邸
問君誰共曳長裾

贈陶使君求梨

昨宵宴罷醉如泥
惟憶張君大谷梨
白玉花繁曾綴處
黃金色嫩乍成時
冷侵肺腑醒偏早
香惹衣襟歇倍遲
今日中山方酒渴
唯應此物最相宜

陳覺放還至秦州以詩見寄作此答之

朱雲曾為漢家憂
不怕交親作世仇
壯氣未平空咄咄

狂言無驗信悠悠今朝我作傷弓鳥却羨君為不繫舟
勞寄新詩平宿憾此生心氣貫清秋

王三十七自京垂訪作此送之

失鄉遷客在天涯門揜苔垣向水斜只就鱗鴻求遠信
敢言車馬訪貧家煙生柳岸將垂縷雪壓梅園半是花
惆悵明朝罇酒散夢魂相送到京華

陶使君挽歌二首

太守今何在行春去不歸
筵空收管吹郊迥儼驂駢營
外星纔落園中露已晞
傷心梁上鷺猶解向人飛
始憶花前宴笙歌醉夕陽
邨堪城外送衰挽逐歸艎鈴

閣朝猶閉風亭日已荒唯餘遷客淚霑灑後池旁

雪中作

賦分多情客經年去國心
踈鐘寒郭晚密雪水亭深
影迥鴻投渚聲愁雀噪林
他鄉一罇酒獨坐不成斟

賦得風光草際浮

宿露依芳草春郊古陌旁
風輕不盡偃日早未晞陽
耿耿依平遠離離入望長
映空無定彩飄逕有餘光
颭若荷珠亂紛如爍火颭
詩人多感物凝思繞池塘

寒食成判官垂訪因贈

常年寒食在京華今歲清朝在海涯
遠巷蹋歌深夜月

後馬者卷三
隔墻吹管數枝花，鴛鴦得路音塵濶。
鴻鴈分飛道里賒，不是多情成二十。
斷無人解訪貧家。

送客至城西望圖山因寄浙西府中

牧叟鄒生笑語同，莫嗟江上聽秋風。
君看逐客思鄉處，猶在圖山更向東。

送寫真成處士入京

傳神蹤跡本來高，澤畔形容媿彩毫。
京邑功臣多佇望，凌煙閣上莫辭勞。

九日雨中

茱萸房重雨霏微，去國逢秋此恨稀。
目極暫登臺上望，

心遙長向夢中歸。荃蘼路遠愁霜早，
兄弟鄉遙羨鴈飛。唯有多情一枝菊，
滿盃顏色自依依。

寄外甥苗仲武

放逐今來漲海邊，親情多在鳳臺前。
且將聚散為閑事，須信華枯是偶然。
蟬噪疎林村倚郭，鳥飛殘照水連天。
此中唯欠韓康伯，共對秋風詠數篇。

寄從兄憲兼示二弟

別路吳將楚，離憂弟與兄。
斷雲驚晚吹，秋色滿孤城。
信遠鴻初下，鄉遙月共明。
一枝棲未穩，迴首望三京。

附書與鍾郎中因寄京妓越賓

暮春橋下手封書海陵橋名寄向南江問越姑不道諸郎少
歡笑經年相別憶儂無

鍾代答

一幅輕綃寄海濱越姑長感昔時恩欲知別後情多少
點點憑君看淚痕

亞元舍人不替深知猥貽佳作三篇清絕不敢
輕誚因為長歌聊以為報未竟復得子喬校

書示問故兼寄陳君庶資一笑耳

海陵城裏春正月海畔朝陽照殘雪城中有客獨登樓
遙望天邊白銀闕天帝以黃金白銀闕下何英英雕鞍

繡轂趨承明閭門曉闌旌旗影玉墀風細佩環聲此處
追飛皆俊彥當年何事容疵賤懷鈿畫坐紫微宮焚香
夜直明光殿王言簡靜官司閑朋好殷勤多往還新亭
風景如東洛邛嶺林泉似北山光陰暗度盃盃裏職業
未妨談笑間有時邀賓復攜妓造門不問都非是酣歌
叫笑驚四鄰賦筆縱橫動千字任他銀箭轉更籌不怕
金吾司夜吏可憐諸貴賢且才時情物望兩無猜伊余
獨稟狂狷性褊量多言仍薄命吞舟可漏豈無恩負乘
自貽非不幸一朝削跡為遷客旦暮青雲千里隔離鴻
別鴈各分飛折柳攀花兩無色盧龍渡口問迷津衣步

山前送暮春去年三月三日白沙江上曾行路青林花

落何紛紛漢皇昔幸回中道昇元中扈駕東極目牛羊卧

芳草舊宅重游盡隙荒故人相見多衰老禪智寺山光

橋風瑟瑟兮雨蕭蕭行盃已醒殘夢斷征途未極離魂

消海陵郡中陶太守相逢本是隨行舊乍申拜起已開

眉却問辛勤還執手精廬外水榭最清幽一稅征車聊駐

留閉門思過謝來客知恩者分寬離憂郡齋勝境有後

池山亭茵閣互參差有時虛左佐來相召舉白飛觴任所

為多才太守能搥鼓醉送金船間歌舞酒酣耳熱眼生

花暫似京華歡會處歸來旅館還端居清風朗月夜牕

虛駸駸流景歲云暮天涯望斷故人書春來憑檻方歎

息仰頭忽見南來翼足繫紅牋墮我前引頸長鳴如有

言開緘試讀相思字乃是多情喬亞元短韻三篇皆麗

絕小梅寄意情偏切亞元詩云借問小梅應得信金蘭

投分一何堅銀鈎置袖終難滅醉後狂言何足竒感君

知已不相遺長卿曾作美人賦玄成今有責躬詩銘去春醉

中贈醉妓長歌酷為喬君所賞未篇所引故以謝之報章欲托還京信筆拙紙窮

情未盡珍重芸香陳子喬亦解貽書遠相問寧須買藥

療羈愁只恨無書消鄙吝子喬問葉物所要又游處當

時靡不同歡娛今日兩成空天子尚應憐賈誼時人未

要嘲楊雄曲終筆閣緘封已翩翩驛騎行塵起寄向中朝謝故人為說相思意如此

送荆司錄歸京

早年間有蒯先生二十餘年道不行抵掌曾論天下事折腰猶悟俗人情老還上國歡娛少貧聚歸資結束輕遷客臨流倍惆悵冷風黃葉滿山城

聞查建州陷賊寄鍾郎中

謨即查從事也

聞道將軍輕壯圖螺城江下委犀渠旌旗零落沉荒服簪履蕭條返故居皓首應全蘇武節故人誰得李陵書自憐放逐無長策空使盧諶淚滿裾

還過東都留守周公筵上贈座客

賈生三載在長沙故友相思道路賒已分終年甘寂寞豈知今日返京華麟符上相思偏厚隋苑留歡日欲斜明旦江頭倍惆悵遠山芳草映殘霞

送楊郎中唐員外奉使湖南

江邊微雨柳條新握節含香二使臣兩綬對懸雲夢日方舟齊汎洞庭春今朝草木逢新律昨日山川滿戰塵同是多情懷古客不妨為賦吊靈均

表弟包穎見寄

此子侍親在饒州累年卧病

常思帝里奉交親別後光陰屈指頻蘭佩却歸綸閣下

荆枝猶寄楚江濱十程山水勞幽夢滿院煙花醉別人
料得此生強健在會須重賞昔年春

和

平生中表最情親浮世那堪聚散頻謝眺却吟歸省閣
劉楨猶自臥漳濱舊游半似前生事要路多逢後進人
且喜新吟報強健明年相望杏園春

寄蕭給事蕭江西致仕

危言危行古時人歸向西山臥白雲買宅尚尋徐處士
殞霞終訪許真君容顏別後應如故詩詠年來更不聞
今日城中春又至落梅愁緒共紛紛

送鍾員外詩序

歲辛亥冬十月天子命吾友德林為東府亞尹太弟諭
德蕭君泊諸客餞於石頭城雲日蒼茫園林搖落罇酒
將竭征帆欲飛處者眷眷而不能迴行者遲遲而不忍
去煙生景夕風靜江平君子曰公足以減私子當促棹
詩所以言志我當分題故以風月松竹山石寄情於贈
別云爾兵部員外郎知制誥徐鉉序

賦石奉送德林少尹員外

鉉上

我愛他山石中含絕代珍煙披寒落落沙淺靜磷磷翠
色辭文陞清聲出泗濱扁舟載歸去知是汎槎人

賦月

蕭或上

麗漢金波滿當筵玉笋傾因思頻聚散幾復換虧盈光
徹離襟冷聲符別管清那堪還自此兩地倚樓情

賦竹

孫峴山上

萬物中蕭灑修篁獨逸羣貞姿曾冒雪高節欲凌雲細
韻風初發濃煙日正曛因題偏惜別不可暫無君

賦松

謝仲宣上

送人多折柳唯我獨吟松若保歲寒在何妨霜雪重森
梢逢靜境廓落見孤峯還似君高節亭亭勸繼蹤

賦風

王沂上

靜追蘋末興况復值蕭條猛勢資新鴈寒聲伴暮潮過
山雲散亂經樹葉飄飄今日煙江上征帆望望遙

賦山別諸知己

鍾藉上

暮景江亭上雲山日望多只愁辭輦轂長恨隔嵯峨有
意圖功業無心憶薜蘿親朋將遠別且共醉笙歌

贈秦州掾令胡克已

文公曾孫

念子才多命且奇亂中拋擲少年時深藏七澤衣如雪
却見中朝髮似絲舊德在人終遠大扁舟為吏莫推辭
孤芳自愛凌霜處詠取文公白菊詩

送荻栽與秀才朱觀

羨子清吟處茅齋面碧流解憎蓮豔俗唯欠荻花幽鷺
立低枝晚風驚折葉秋贈君須種取不必樹忘憂

使浙西先寄獻燕王侍中

京江風靜喜乘流極目遙瞻萬歲樓喜氣龍葱甘露晚
水煙波淡海門秋五年不見鸞臺長明日將陪兔苑遊
欲問平臺門下吏相君還許吐茵不

常州驛中喜雨

颶颶旱天雨涼風一夕迴遠尋南畝去細入驛亭來
羨唱牛初牧漁歌棹正開盈庭頓無事歸思酌金壘

驛中七夕

七夕雨初霽行人正憶家江天望河漢水館折蓮花獨
坐涼何甚微吟月易斜今年不乞巧鈍拙轉堪嗟

贈浙西顧推官

盛府賓寮八十餘閉門高卧興無如梁王苑裏相逢早
潤浦城中得信踈狼籍盃盤重會面風流才調一如初
願君百歲猶強健他日相尋隱士廬

贈浙西妓亞仙筵上作

翠黛嚔如怨朱顏醉更春占將南國貌惱殺別家人粉
汗沾巡盞花鈿逐舞茵明朝綺牕下離恨兩殷勤

迴至瓜洲獻侍中

紫薇垣裏舊賓從，來向吳門謁府公。
奉使謬持嚴助節，登門初識魯王宮。
笙歌隱隱違離後，煙水茫茫悵望中。
日暮瓜洲江北岸，兩行清淚滴西風。

邵伯埭下寄南郵陳郎中

故人相別動經年，候館相逢倍慘然。
願我飲冰難輟棹，感君扶病為開筵。
河灣水淺翹愁鷺，柳岸風微噪暮蟬。
欲識酒醒魂斷處，謝公祠畔客亭前。

謫居館州累得韓高二舍人書作此寄之

三峰煙靄碧臨谿，中有騷人理釣絲。
會友少于分袂日，謫居多却在朝時。
丹心歷歷吾終信，俗慮悠悠爾不知。

珍重韓君與高子，殷勤書札寄相思。

舒人以潛曉天柱為三峯

和張先輩見寄二首

去國離羣擲歲華，病容憔悴媿丹砂。
谿連舍下衣長潤，山帶城邊日易斜。
幾處垂鈎依野岸，有時披褐到鄰家。
故人書札頻相慰，誰道西京道路賒。
清時淪放在山州，印杖紗巾處處游。
野日蒼茫悲鵬舍，水風陰濕獎貂裘。
雞鳴候旦寧辭晦，松節凌霜幾換秋。
兩首新詩千里道，感君情分獨知丘。

印秀才至舒州見尋別後寄詩依韻和

羈游白社身雖屈，高步辭場道不卑。
投分共為知我者，

相尋多媿謫居時離懷耿耿年來夢厚意勤勤別後詩
今日谿邊正相憶雪晴山秀柳絲垂

行園樹

松節凌霜久蓬根逐吹頻羣生各有性桃李但爭春

題雷公井

揜雷愚公谷蕭寥羽客家俗人知處所應為有桃花

送彭秀才

賈生去國已三年短褐閑行曉水邊盡日野雲生舍下
有時京信到門前無人與和投湘賦媿子來浮訪戴船
滿袖新詩好迴去莫隨騷客醉林泉

移饒州別周使君

正憐東道感賢侯何幸南冠脫楚囚曉伯臺前收別宴
喬公亭下艤行舟四年去國身將老百郡徵兵主尚憂
更向鄱陽湖上去青衫憔悴淚交流

避難東歸依韻和黃秀才見寄

感感逢人問所之東流相送向京畿自甘逐客紉蘭佩
不料平民著戰衣樹帶荒村春冷落江澄霽色霧霏微
時危道喪無才術空手徘徊不忍歸

訓郭先輩

太原郭夫子行高文炳蔚弱齡負世譽一舉游月窟及

仙籍第三人時人故稱

屈昔余更西省領蓋名

我竄群舒向風心鬱鬱歸來暮江上雲霧一披拂雷雨
不下施猶作池中物念君介然氣感時思奮發示我數
篇文與我爭馳突綵褥榮英華理深剖肌骨古詩尤精
奧史論皆宏拔舉此措諸民何憂民不活吁嗟吾道薄
與世長迂闊顧我徒有心數竒身正詘論兵屬少年經
國須儒術夫子無自輕蒼生正愁疾

和集賢鍾郎中

石渠冊府神仙署當用明朝第一人腰下別懸新印綬
座中皆是故交親龍池樹色供清景浴殿香風接近鄰
從此翻飛應更遠徧尋三十六天春

送劉山陽

舊族知名士朱衣宰楚城所嗟無道薄是豈主恩輕戰
鼓何時息儒冠獨自行此心多感激相送若為情

題伏龜山北隅

茲山信岑寂陰崖積蒼翠水石何必多宛有千巖意孰
知近人境旦暮含佳氣池影搖輕風林光澹新霽支頤
藉芳草自足忘世事未得歸去來聊為宴居地

送黃梅江明府

江前為江夏令有善政今更
宰小邑賦詩留別作此和之

封疆多難正經綸臺閣如何不用君江上又勞為小邑
篋中徒自有雄文書生膽氣人誰信遠俗歌謠主不聞

一首新詩無限意再三吟咏向秋風

詠梅子真送郭先輩

忠臣本愛君仁人本愛民寧知貴與賤豈計名與身梅
生為一尉獻疏來君門君門深萬里金虎重千鈞向永
且不用劉向况復論子真拂衣遂長往高節邈無隣至
今仙籍中謂之梅真人郭生負逸氣百代繼遺塵進退
生自知得喪吾不陳斯民苟有幸期子一朝伸

和蕭郎中午日見寄

細雨輕風采藥時
寒簾隱几更何為
豈知澤畔紉蘭客
來赴城中角黍期
多罪靜思如剝蘄
赦書纔聽似含飴

謝公制勝常閑暇願接西州敵手棊

送黃秀才姑熟辟命

世亂離情苦家貧色養難
水雲孤棹去風雨暮春寒
幕府才方急騷人淚未乾
何時王道泰萬里看鵬搏

送王四十五歸東都

海內兵方起離筵淚易垂
憐君負米去惜此落花時
想憶看來信相寬指後期
殷勤手中柳此是向南枝

和太常蕭少卿近郊馬上偶吟

田園經雨綠分畦飛蓋閑行九里堤
拂袖清風塵不起滿川芳草路如迷
林開始覺晴天迥潮上初驚浦岸齊

怪得仙郎詩句好，斷霞殘照遠山西。

又和

抱甕何人灌藥畦，金銜為爾駐平堤。
村橋野店景無限，綠水晴天思欲迷。
橫笛乍隨輕吹斷，歸帆疑與遠山齊。
鳳城迴望真堪畫，萬戶千門蔣嶠西。

拋毬樂辭二首

歌舞送飛毬，金觥碧玉籌。
管弦桃李月，簾幕鳳凰樓。
一笑千場醉，浮名任白頭。
灼灼傳花枝，紛紛度畫旂。
不知紅燭下，照見彩毬飛。
借勢因期尅，巫山暮雨歸。

雜歌辭五首

莫折紅芳樹，但知畫意看。
狂風幸無意，那忍折教殘。
朝日城南路，旌旗照綠蕪。
使君何處去，桑下覓羅敷。
事與年俱往，情將分共深。
莫驚容髮改，只是舊時心。
暫別勞相送，佳期願莫違。
朱顏不須老，留取待郎歸。
拂匣收珠佩，迴燈拭薄粧。
莫嫌春夜短，匹是楚襄王。

夢游三首

魂夢悠揚不奈何，夜來還在故人家。
香濃蠟燭時時暗，戶映屏風故故斜。
檀的慢調銀字管，雲鬟低綴折枝花。
天明又作人間別，洞口春深道路賒。

繡幌銀屏杳靄間若非魂夢到應難
牕前人靜偏宜夜
戶內春濃不識寒
蘸甲遞觴纖似玉
含詞忍笑膩於檀
錦書若要知名字
滿縣花開不姓潘
南國佳人字玉兒
芙蓉雙臉遠山眉
仙郎有約長相憶
阿母無猜不得知
夢裏行雲還倏忽
暗中携手乍疑遲
因思別後閑牕下
織得迴文幾首詩

徐公文集卷第三

徐公文集卷第四

東海徐鉉

和蕭少卿見慶新居

湘浦懷沙已不疑
京城賜第豈前期
鼓聲到晚知坊遠
山色來多與靜宜
簪履尚應憐故物
稻粱空自媿華池
新詩問我偏饒思
還念鷓鴣得一枝

又和

鷺蓬偶駐知多幸
斷鴈重聯愜素期
當戶小山如舊識
上墻幽蘚最相宜
清風不去因栽竹
隙地無多也鑿池
更喜良鄰有嘉樹
綠陰分得近南枝

送勳道人之建安
下國兵方起君家義獨聞若為輕世利歸去卧溪雲挂
席衝嵐翠携筇破蘚紋離情似霜葉江上正紛紛

送許郎中歙州判官兼黟縣

嘗聞黟縣似桃源况是優游冠玳筵遺愛非遙應卧理
許嘗宰祖風猶在好尋仙許宣平黟朝衣舊識熏香史
涇縣祿米初營種秫田大底官游須自適莫辭離別二三年

送彭秀才南游

問君孤棹去何之玉筍春風楚水西山上斷雲分翠靄
林間晴雪入澄溪琴心酒趣神相會道士仙童手共携

他日時清更隨計莫如劉阮洞中迷

和明上人除夜見寄

酌酒圍爐久愁襟默自增長年逢歲暮多病見共興夜
色開庭燎寒威入硯冰湯師無別念吟坐一燈凝

正初和鄂州邊郎中見寄

潦倒含香客淒涼賦鵬人未能全卷舌終擬學垂綸故
友睽離久音書問訊頻相思俱老大又見一年新

送劉司直出宰

之子有雄文風標秀不羣低飛從墨綬逸志在青雲柳
色臨流動春光到縣分賢人多靜理未爽醉醺醺

送從兄赴臨川幕

梁王籍寵就東藩還召鄒枚坐兔園今日好論天下事
昔年同受主人恩石頭城下春潮滿金柅亭邊綠樹繁
唯有音書慰離別一杯相送別無言

送龔員外赴江州幕

煩君更上築金臺世難民勞籍俊才自有聲名馳羽檄
不妨談笑舉罇壘元規樓迥清風滿匡俗仙春畫障開
莫忘故人離別恨海潮迴處寄書來

送朱先輩尉廬陵

我重朱夫子依然見古人成名無媿色得祿及慈親莫

歎官資屈寧論活計貧平生心氣在終在靜邊塵

送德林郎中學士赴東府詩序

德林始以才術優贍入參近司旋以地望清雅罷登書
殿會東畿克復上以君有遺愛於淮海之都故輟侍從
之班攝尹正之任吾一二親友共餞行舟鉉也不才請
以言贈理大國若烹小鮮言不可撓之也况亂後乎德
林當本仁守信體寬務斷大兵之後民各思又聽其自
理任其自營為之上者導其蒙過其滯而已示之以聰
明則民益迷拘之以禁令則民重困棄仁則吏暴失信
則衆惑急則民傷不斷則民懈慎此四者何往而不臧

噫嘻吾黨皆忘形者也平生以來昏會者幾何思當雞
犬相聞每與不接開口而笑攜手而遊在吾輩勉之而
已忘身狗國急病讓夷德林此行宜減離戀盍各賦一
物以為贈乎九月十七日序

得江 奉送德林郎中學士

喬舜上

摻袂向江頭朝宗勢未休何人乘桂楫之子過揚州
颺颺沙鴈漂漂逐浪鷗欲知離別恨半是淚和流

得酒

徐鉉上

酌此杯中物茱萸滿把秋今朝將送別他日是忘憂世
亂方多事年加易得愁政成頻一醉亦未減風流

得菊

蕭彧上

離情折楊柳此別異春哉含露東籬豔汎香南浦杯惜
持行次贈留挿醉中迴暮齒如能制玉山更判顏

得遠山

徐鉉上

衣步妖氛滅崑岡草樹清終朝空極望今日送君行報
政秋雲靜微吟曉月生樓中長可見持用減離情

得水

陳元裕上

上善湛然秋恩波洽帝猷謾言生險浪豈與見安流汎
去星槎遠澄來月練浮滔滔對離酌入洛稱仙舟

得新鴻別諸同志

鍾嶠上

隨陽
陳揚來萬里點點度遙空影落長江水聲悲半夜風殘
秋辭絕漢無定似驚蓬我有離羣恨飄飄類此鴻

送陳先生之洪井寄蕭少卿

聞君仙袂指洪涯我憶情人別路賒知有歡娛游楚澤
更無書札到京華雲開驛閣連江靜春滿西山倚漢斜
此處相逢應見問為言搔首望龍沙

送龔明府九江歸寧

茂宰隨官去扁舟着綠衣溫城春酒熟斤阜野花稀解
纜垂楊綠開帆宿鷺飛一朝吾道泰還逐落潮歸

和江西蕭少卿見寄二首

亡羊岐路媿司南二紀窮通聚散三老去何妨從笑傲
病來看欲嬾朝參離腸似線常憂斷世態如湯不可探
珍重加餐省思慮時時酌酒壓山嵐

身遙上國三千里名在朝中二十春金印不須辭入幕
麻衣曾此嘆迷津卷舒由我真齊物憂喜忘心即養神
世路風波自翻覆虛舟無計得沉淪

送薛少卿赴青陽

我愛陶靖節吏隱從弦歌我愛費徵君高卧歸九華清
風激頽波來者無以加我志兩不遂漂淪浩無涯數奇
時且亂此圖今愈賒賢哉薛夫子高舉凌晨霞安民即

是道投足皆為家功名與權位悠悠何用誇携朋出遠
郊酌酒藉平沙雲收遠天靜江闊片帆斜離懷與契羨
南望長咨嗟

送高起居之涇縣

右史罷朝歸之官白水湄別我行千里送君傾一卮酒
罷長嘆息此嘆君應悲亂中吾道薄鄉俗舊人稀胡為
佩銅墨此去白玉墀吏事豈所堪民病何可醫藏用清
其心此外慎勿為縣郭有佳境千峯谿水西雲樹杳迴
合巖巒互蔽虧彈琴坐其中世事吾不知時時寄書札
以慰長相思

宿茅山寄舍弟

茅許稟靈氣一家同上賓仙山空有廟舉世更無人獨
往誠違俗浮名亦累真當年各自勉雲洞鎮長春

晚憩白鶴廟寄句容張少府

日入林初靜山空暑更寒泉鳴細巖竇鶴唳眇雲端拂
榻安碁局焚香戴道冠望君如不見終夕凭欄干

題紫陽觀

南朝名士富仙才追步東鄉遂不迴丹井自深桐暗老
祠宮長在鶴頻來巖邊桂樹攀仍倚洞口桃花落復開
惆悵霓裳太平事一函真跡鏤昭臺

贈奚道士

合象

奚生曾有洞天期，猶傍天壇摘紫芝。
處世自能心混沌，全真誰見德支離。
玉霄壁閣人長在，金鼎功成俗未知。
他日飈輪謁茅許，願同雞犬去相隨。

題碧巖亭贈孫尊師

絕境何人識，高亭萬象含。
凭軒臨樹杪，逆目極天南。
積靄生泉洞，歸雲鎖石龕。
丹霞披翠巘，白鳥帶晴嵐。
仙去留虛室，龍歸漲碧潭。
幽巖君獨愛，玄味我曾耽。
世上愁何限，人間事久諳。
終須脫羈鞅，來此會空談。

題白鶴廟

平生心事向玄關，一入仙鄉似舊山。
白鶴唳空晴眇眇，丹砂流澗暮潺潺。
潺嘗嗟多病，嫌中藥擬問真經。
乞小還滿洞煙霞互，陵亂何峯臺榭是蕭閑。

步虛詞五首

氣為還元_二正心由抱一，靈凝神歸罔象飛。
步入青冥整服乘三素，旋網攝九星瓊章開。
後學稽首奉真經，天帝黃金闕真人。
紫錦書霓裳，紛蔽景羽服。迥陵虛白鶴，能為使班麟。
解駕車靈符，終願借轉共世情。踈聖主過幽谷，虛星在藥宮。
五千宗物母，七字祕神童。世上金壺遠，人間玉籙空。
唯餘養身法，修此與天通。

何處求玄解人間有洞天勤行皆是道謫下尚為仙蔽
景乘朱鳳排虛駕紫煙不嫌園吏傲願在玉宸前
三素霏霏遠盟威凜凜寒火鈴空滅沒星斗曉闌干佩
響流虛殿爐煙在醮壇蕭寥不可極驂駕上雲端
留題
瑤壇醮罷晚雲開羽客分飛俗士迴為報移文不須勒
未曾游處待重來

和陳洗馬山莊新泉

已開山館待抽簪更要巖泉欲洗心常被松聲迷細韻
忽流花片落高岑便疏淺瀨穿莎徑始有晴光映竹林

何日煎茶醞香酒沙邊同聽暝猿吟

奉和七夕應令

今宵星漢共晶光應笑羅敷嫁侍郎斗柄易傾離恨促
河流不盡後期長靜聞天籟疑鳴佩醉折荷花想豔粧
誰見宣猷堂上宴一篇清韻振金鐺

又和八日

微雲疎雨淡新秋曉夢依稀十二樓故作別離應有以
擬延更漏共無由那教人世長多恨未必天仙不解愁
博望苑中殘酒醒香風佳氣獨遲留

和印先輩及第後獻座主朱舍人郊居之作

成名郊外揜柴扉樹影蟬聲共息機積雨暗封青蘚徑
好風輕透白踈衣嘉魚始賦人爭誦荆玉頻收國自肥
獨坐公廳正煩暑喜吟新詠見玄微

印以南有嘉魚賦及第

和致仕張尚書新創道院

梓澤成新致金丹有舊情挂冠朝睡足隱几暮江清藥
圃分輕綠松牕起細聲養高寧厭病默坐對諸生

尚書時有瘡疾

和尉遲贊善秋暮僻居

登高節物最堪憐小嶺踈林對檻前輕吹斷時雲縹緲
夕陽明處水澄鮮江城秋早催寒事望苑朝稀足晏眠
庭有菊花罇有酒若方陶令媿猶賢

和陳贊善致仕還京口

海門山下一漁舟中有高人未白頭已駕安車歸故里
尚通閨籍在龍樓泉聲漱玉牕前落江色和煙檻外流
今日君臣厚終始不須辛苦畫雙牛

京使迴自臨川得從兄書寄詩依韻和

珍重還京使殷勤話故人別離長挂夢寵祿不闕身趣
向今成道聲華舊絕塵莫嗟容髮老詩句逐時新

陪鄭王相公賦簷前垂冰應教依韻

牕外虛明雪乍晴簷前垂露盡成冰長廊瓦疊行行密
晚院風高寸寸增玉指乍拈簪尚媿金階時墜磬難勝

晨食堪醒曹參酒自恨空腸並不能

病

送禮部潘尚書致仕還建安

名遂功成累復輕鱸魚因起舊鄉情履聲初下金華省
帆影看離石首城化劍津頭尋故老同亭會上問仙鄉
冥鴻高舉真難事相送何須淚滿纓

和尉遲贊善病中見寄

仙郎移病暑天過却似冥鴻避尉羅晝夢乍驚風動竹
夜吟時覺露霑莎情親稍喜貧居近性懶猶嫌上直多
望苑恩深期勿藥青雲岐路未蹉跎

池州陳使君見示游齊山詩回寄

往歲曾遊美水亭齊峯濃翠暮軒橫猿出檻心雖喜
傷鳥聞弦勢易驚病後簪纓殊寡興老來泉石倍關情
今朝池口風波靜遙賀山前有頌聲

再領制誥和王明府見賀

蹇步還依列宿邊拱宸重認舊雲天自嗟多難飄零困
不似當年膽氣全雞樹晚花踈向日龍池輕浪細含煙
從來不解為身計一葉悠悠任大川

送高舍人使嶺南

西掖官曹近南溟道路遙使星將渡漢仙棹乍乘潮柳
映靈和折梅依大庾飄江帆風淅淅山館雨蕭蕭陸賈

真迂濶終軍童久寂寥送君何限意把酒一長謔

和王明府見寄

時世情難消吾道薄宦流年厄此身莫歎京華同寂寞
曾經兵革共漂淪對山開戶唯求靜貰酒留賓不道貧
善政空多尚淹屈不知誰是解憂民

和方秦州見寄

逐客西重入京舊愁新恨兩難勝雲收楚塞千山雪
風結秦淮一尺冰置禮筵空情豈盡投湘文就思如凝
更殘月落知孤坐遙望船牕一點星

文獻太子挽歌辭五首

國有承祧重人知秉哲尊清風來望苑遺烈在東藩此
日升緱嶺何日到寢門天高不可問煙靄共昏昏
夏啟共君子周儲上帝賓音容一飄忽功業自紛綸露
泣承華月風驚麗正塵空餘商嶺客行哭下宜春
出處成交讓經綸有大功淚碑仄步北棠樹蒜山東百
揆方時叙重離遂不融故臣偏感咽曾是嘆三窮
甲觀風景促園陵天地長簫笳咽無韻賓御哭相將盛
烈傳彞鼎遺文被樂章君臣知己分零淚亂無行
綵仗清晨出非同齒冑時愁烟鑠平甸朔吹繞寒枝楚
客來何補緱山去莫追迴瞻飛蓋處揜袂不勝悲

送王員外宰德安

家世朱門貴官資粉署優今為百里長應好五峯游柳
影連彭澤湖光接庾樓承明須再入官滿莫淹留

以端谿硯訓張員外水精珠兼和來篇

請以端谿潤疇君水玉明方圓雖異器功用信俱呈自
得山川秀能分日月精中箱各珍重所貴在交情

奉使九華山中塗遇青陽薛郎中

故人相別動相思此地相逢豈素期九子峯前閑未得
五谿橋上坐多時甘泉從幸余知忝宣室徵還子未遲
且喜一杯消別恨野花風起便離披

奉命南使經彭澤

值王明府不在留此

遠使程途未一分離心常要醉醺醺那堪彭澤門前五
黃菊蕭疎不見君

南都遇前嘉魚劉令言游閩嶺作此與之

我持使節經韶石君作閑游過武夷兩地山光成獨賞
隔年鄉思暗相知洪涯壇上長岑寂孺子亭前自別離
珍重分岐一杯酒強加飡飢數吟詩

閩阜山

殿影高低雲揜映松陰繚繞步徘徊從今莫厭簪裾累
不是乘輅不得來

玉笥山留題

仙鄉會應遠王事知何極
征傳莫辭勞玉峯聊一息
形骸已銷散心想都凝寂
真氣自清虛非關好松石
九仙皆積學洞壑多遺跡
遊子歸去來胡為但征役

廬陵別朱觀先輩

桂籍知名有幾人
翻飛相續上青雲
解怜才子寧唯我
遠作卑官尚見君
嶺外獨持嚴助節
宮中誰薦長卿文
新詩試為重高詠
朝漢臺前不可聞

文或少卿文山郎
中交好深至二紀已餘
睽別數年二子長逝
奉使嶺表塗次南康
弔孫氏

之孤於其家觀文或手書於僧室慷慨悲歡
留題此詩

孫家虛座弔諸孤
張叟僧房見手書
二紀歡游今若此
滿衣零淚欲何如
腰間金印從如斗
鏡裏霜華已滿梳
珍重遠公應笑我
塵心唯此未能除

朱處士相與有山水之願見送至南康作此以
別之

憐君送我至南康
更憶梅花庾嶺芳
多少仙山共遊在
願君百歲尚康強

清明日清遠峽作

嶺外春過半塗中火又新殷勤清遠峽留戀北歸人

迴至南康題紫極宮衷道士房

王事信靡盬飲冰安足辭胡為擁征傳乃至天南陸天
南非我鄉留滯忽踰時還經羽人家豁若雲霧披何以
寬我懷老莊有微詞達士無不可至人豈偏為客愁勿
復道為君吟此詩

和歙州陳使君見寄

新安風景好時令肅轅門身貴心彌下功名口不言韜
鈴家法在儒雅素風存簪履陪游盛鄉閭俗化敦臨牕
山色秀繞郭水聲喧織絡文章麗矜嚴道義尊樓臺秋

月靜京庾晚雲屯曉吹傳衙鼓晴陽展信旂一篇貽友
好千里倍心論未見歸驂動空能役夢魂

和賈員外戲見贈玉蘂花栽

瓊瑤一簇帶花來便斲蒼苔手自栽喜見唐昌舊顏色
為君判病酌金罍

光穆皇后挽歌三首

仙馭期難改坤儀道自光闕宮新表德沙麓舊膺祥素
帝堯門揜凝笳畢陌長東風慘陵樹無復見親桑
永樂留虛位長陵啟夕扉返虞嚴吉仗復土揜空衣功
業投三母光靈極四妃唯應彤史在不與露花晞

隱隱闔門路煙雲曉更愁空瞻金輅出非是躍龍游德
感人倫正風行內職修還隨偶物化同此畏軒丘

嚴相公宅牡丹

但是豪家重牡丹爭如丞相閣前看鳳樓日暖開偏早
雞樹陰濃謝更難數朶已應迷國豔一枝何幸上塵冠
不知更許憑欄否爛熳春光未肯殘

侍宴賦得歸鴈

夜靜羣動息翩翩一鴈歸清音天際遠寒影月中微何
處雲同宿長空雪共飛陽和常借便免與素心違

又賦早春書事

苑裏芳華早皇家勝事多弓聲達春氣奕思養天和煖
酒紅爐火浮舟綠水波雪晴農事起擊壤聽賡歌

薔薇詩一首十八韻呈

東海侍郎

太

尉中書令鄭王

從善

綠影覆幽池芳菲四月時管絃朝夕興組繡百千枝盛
引牆看滿高煩架屢移露輕濡綵筆蜂誤拂吟髭日照
玲瓏幔風搖翡翠帷早紅飄薜地狂蔓挂蛛絲嫩刺牽
衣細新條窈窕草垂晚香難暫捨嬌態自相窺深淺分前
後容華互盛衰罇前留客久月下欲歸遲何處繁臨砌
誰家密映籬絳羅房燦爛碧玉葉參差分得殷勤種開

來遠近知晶熒歌袖袂柔弱舞腰支膏麝誰將比庭萱
自合唾勻粧低水鑑泣淚滴煙霽盡擬憑梁廣名宜亞
楚姬寄君十八韻思拙媿新奇

依韻和令公大王薔薇詩

綠樹成陰後羣芳稍歇時誰將新濯錦挂向最長枝卷
箔香先入凭欄影任移賞頻嫌酒渴吟苦怕霜髭架迴
籠雲幄庭虛展繡帷有情縈舞袖無力罨遊絲嫩藥鶯
偷采柔條柳伴垂荀池波自照梁苑客當窺玉李尋皆
謝金桃亦暗衰花中應獨貴庭下故開遲委豔粧苔砌
分華借槿籬低昂勻灼爍濃淡疊參差幸植王宮裏仍

逢宰府知芳心向誰許醉態不能支芍藥天教避玫瑰
衆共嗤光明烘晝景潤膩衰輕霸麗似期神女珍如重
衛姬君王偏屬詠七子盡搜奇

和門下殷侍郎新茶二十韻

暖吹入春園新芽競粲然才教鷹嘴拆未放雪花妍荷
杖青林下攜^筇岸旭景前採茶須在日未出前孕靈資雨露鍾秀自

山川碾後香彌遠熏來色更鮮名隨土地貴味逐水泉

遷力籍流黃暖形模紫筍圓茶之美者有員捲紫筍正當鑽柳火

遙想湧金泉陽羨茶山有金涉泉修貢時出任道時新物須依古法煎

輕甌浮綠孔孤竈散餘煙甘薺非予匹宮槐讓我先芽

亦可
為茶竹孤空冉冉荷弱謾田田解渴消殘酒清神感夜
眠十漿何足饋百榼靜堪捐采擷唯憂晚營求不計錢
任公因焙顯陸氏有經傳愛甚真成癖嘗多合得仙亭
臺虛靜處風月豔陽天自可臨泉石何妨雜管絃東山
似蒙頂願得從諸賢

徐公文集卷第四

